



zämehäng

Text: Hans Jürg Zingg

Melodie: Hans Jürg Zingg

Begleitimprovisation: Edwin Peter

jitz göht mr mal ewägg mit öjne zämehäng
di zämehäng sy mir so breit wi läng
jitz höret mr mal uf mit öjer bschtändige kritik
itz fahret mr mal ab mit sport u politik
i wott itz fernseh luege s chunnt e mätsch
u wär no öppis stürmt däm gib i brätsch
i ha fyrabe bruuche myni rue
u da ghört sport ja sport derzue

i ha doch ds rächt – oder han i das nid –
e schuttmätsch z luege u a nüt als schutte z danke
mi nid dür politik vom sportgscheh la abzläнке
i ha doch ds rächt – oder han i das nid –
uf myni prichterschtattig us olympia
syg das olympia nun i den usa
oder im rote russerych
das isch doch wäger öppe glych
öb d fuessball-wm z ängland z argentinie louf
dr schyzirkus sech z chile i dr schwyz vrchouf
am fernsehschirm sy alli räase grünen
d schypiste wyss u d abfahrtshelde küen
das isch ja ds herrlechen am sport:
dr mönsch vrschteit sech ohni wort
u wältrekord isch wältrekord

jitz göht mr mal ewägg mi öjne zämehäng
rächtsdiktatur? folterbande? afghanistan?
di zämehäng sy mir so breit wi läng
wäg däm isch argentinie glych wältmeischer worde u d russe
hei glych am meischte guldmedalje heibbrunge – chöi doch di
sportler nüt drfür we ihri regierige seich ablöh
jitz höret mr mal uf mit öjer bschtändige kritik
sport machi tumm u settigi sprüch - mit öjne blödsinnige
boykott wo eim di ganzi fröid am konkurrenzkampf tüe vrsoue
jitz fahret mr mal ab mit sport u politik

i wott itz fernseh luege s chunnt e mätsch
u wär no öppis schtürmt däm gib i brätsch
i ha fyrabe bruuche myni rue
u da ghört sport ja sport derzue

lue i has geng gseit: politik isch es dräckgschäft – sport isch e suberi sach
politik isch en einzigi grossi lugi – sport isch das einzig wahre wo üs no blybt
vrschteisch
drum muesch doch äntlech mal di zämehäng vrgässe – dasch ja äbe grad ds
schönen am sport

d ddr-ler d russe d tscheche möge kommunischesöi sy
aber turne hockeyspile schanzesprunge mol das chöi si
und ou d neger wo doch fuli sieche sy eis muesch ne la
hei zum seckle boxe ggumpe geng e mordsbegabig gha

we ar wm z argentinie der herr general videla
sich sys land u syni junta wott vor beschte syte gseh la
de mues är politisch rue und ornig schaffen i däm land
und wenn nötig düregryffe mit gewalt und starker hand

das isch z moskou ou nid anders schliesslech gits no gueti sitte
het me gescht im hus de weiss me vor de gescht da wird nid gstritte
drum wird d kremlstadt samt stadie uf hochglanz ufpoliert
u was dissidänt isch z rächte zyt uf ds land evakuiert

dänket doch wi froh mir wäre sötti d schwyz mal i dä fall cho
am nen internationale sportaalass sötts zu krawall cho
u mir müessten üs nid schämen als turischtevatterland
dank der polizei wo rasch di situation de hätt ir hand

s wird langsam zyt dass mir is wehre
gäg alls won is wott üse fyrabe schtöre
dr bildschirm vrsoue
s chunnt ja glych kene nache i der schysspölitik
isch ja glych alls nume manipuliert

hingägen im sport – oder stimmts öppe nid –
da chasch no tate gseh no objektivi leischtig
u zwar nid nume physisch nei ou seelisch-geischtig
da gits no kampfgeischt ehrgyz wille disziplin
da bruuchsch nid z frage *welt meingott wo fährst du hin*
u alls isch mässbar klar u gnau u d regle international
da hesch es wärtsyschtem wo wältwytt gültig isch
da chunnsch no druus was louft u weisch woraa de bisch
da weisch wär guet isch u wär schlächt
wo d niderlag nur päch isch gsy und wo gerächt
ir politik isch das nid so drum redet äntlech nümme drvo
si macht eim chrank dr sport macht froh

(hjz 1980)